

執齋先生文集

其仁而且公又如此然先生素以道自高頗爲當道所忌
丁未竟以事罷歸行橐蕭然無少增於其素然鄉人高先
生之才徵文者屢千里而至質疑請益戶之外屢常滿平
生厚倫誼父母有疾夕弗離扶持浣拭之勤必身是任
事諸兄曲盡情禮且能掩過以全歡故始終無間初領薦
時所司命舉入學一人屬貲爲行費先生承父志舉其兄
之子師賓之禮率已出焉母之女弟老無依之官迎養雖
罷歸奉之如初性嚴整不妄語笑與人交雖極和易而中
不可撓族黨有爭直言決之且斥罷其飲食之費癸亥疫
作故居少長良憇無或免者先生日往視之務俾得所嫂

孫氏沒于疾兄適他出先生處其殯奠且率人掩其壙衆以爲懼更相諫戒弗恤也其嗜書蓋出天性自少至老雖疾病事故手未嘗一日釋書抽繹義理之餘多摘其要語而錄之風日清和則又臨摹法帖故文辭既富而字畫亦精嘗撰家乘後序瓊山丘公見之嘆曰南豐可擬也所著有丹厓集藏于家尤善誨人講習之餘與之道古今或循行溪山從之遊使人有悠然自得之趣爲文辭先示太意閥其不逮使復爲之點竄數四然後加隱禁焉故門下多佳士其得雋者恒十之五六云今年春正月先生若聞歌薤露聲無何感疾屢藥弗興三月初七日子刻先生呼諸

子語曰吾已矣蓋棺事定墓石之文劉氏兄弟可也言已
遂終距其生宣德乙卯七月十三日享年七十有四元娶
龍泉下墓朱氏卒于任續娶苦水谷村李氏子男六
大慶壬子鄉薦士朝慶邑庠弟子昌廷慶後先生數月卒女三
孫男五孫女一大慶自春官歸卜吉於邑十都井頭嶺之
原壬艮山未坤向以冬十一月丁酉奉厝嗚呼先生畜德
振華而含章沒世宜有文章大家爲之發揚以名後世顧
相知多已彫謝而後進又弗及知故門下小子不獲已強
顏以相茲役然嗣子方以遠大自期顯融有日其表於墓
上大書深刻若灑岡阡固可待也姑銘之以俟銘曰

武姥印印龍津洋洋南豐之裔世篤厥祥先生嗣起振
武周行踵開襲固益奮弗疆蘭臺石室翠玉浩穰抽思
秉翰元化翕張摛辭掞藻綺綉焜煌亦既小試彼哉臧
倉榮爵匪貴德義孔臧婆娑丘園逾老而康雍歌興疾
吉壤遘藏君子有卒君子之常星漢天章風雲雨暘敬
爾承祜先生不亡

資政大夫南京工部尚書李公墓誌銘

皇明列聖以至治圓天下熙洽涵濡至弘治極矣方是時
孝皇帝以盛德作于上爲之宰輔者類皆宏材偉器得人
之盛與宋屢曆諸君才比隆若南都大司徒睢陽李公其

一人也公諱孟陽字時雍別號南岡世爲睢之長岡里人
祖諱都不仕考諱斌歷渭南敍縣丞俱以公貴累贈都察
院右副都御史南京工部尚書妣張氏繼岳氏俱夫人公
以宣德壬子生于渭南官舍八歲入小學十五受尚書天
順壬午中河南鄉試遊大學取天下英俊爲麗澤交名籍
甚僉司成邢公被謗公率同列上書辯誼聲振於一時成
化壬辰登進士戶科給事中癸卯盤糧大同值虜寇入邊
危甚歸陳邊備十事所陳民壯事著爲令甲辰使占城時
占城爲安南所侵其王爲安南所害

朝廷遣使封王之弟齊亞麻勿菴未至而勿菴死其臣提

婆答者攘所封印故復遣公封王之次第古來公行上言
占城險僻安南之構未靖而提婆答又嘗竊據萬一弗順
損中國威宜縱其來使傳命古來仍勅安南悔過上悉從
之乙巳遙擢科都給事中留廣中數年卒致士來厤州
而定其封弘治戊申始歸陳地方五事曰懲舊輕以脩軍
政設兵備以鎮邊方開衙門以散噲聚脩城垣以禦寇患
通朝報以廣德意多見採納尋擢湖廣左叅政常德歎民
飢公分守其地戢盜賊抑豪橫通米商禁藩府之苛革里
書之弊用蘇其民庚戌晉廣西左布政使屬夷獠爲訐而
廩食多匱衆口囂然公亟遣官糴諸遠而實之軍餉以給

乙卯遷都察院右副都御史提督南京糧儲奏脩官廨以便分理折支勲臣祿米以省轉輸戊午轉南京戶部侍郎壬戌晉拜工部尚書中官以宮殿傾圯欲脩之屢詣公言公徐曰萬世不拔之基已有定所脩此何爲議乃塞南畿織造多取資常課歲久爲勢家所侵公一清之於是課增用足而民不擾言者又以災傷欲併常課蠲之公獨以爲常洲人所爭佃其利可知苟蠲其課而國用不足則將加派於民是損本實而益浮蠹也抗言尼之雖掇怨不惜正德丙寅乞致其事疏三上而後獲允有清慎老成之褒

錫誥給驛月廩歲隸

恩數甚優自後權奸用事士夫保全者鮮公知幾矣哉已
巳公薨于家享年七十有八辛未

賜祭葬壬申二月卜吉于城西二里之原配王氏繼室紀

氏贈封夫人第某與公聯甲第歷官憲使子天叙克家先

公卒女四人天叙既卒愈議以憲使公仲子天瑞後公今

國學生是爲公嗣而天叙所螟子曰用章今州學生是爲

公孫公性坦易襟度恢宏已之善不吝於人人之善若有

諸已書所謂其心休休焉其如有容焉者公之謂歟所著

有南崗吟稿三卷奏議一卷唯州誌一卷存于家嗚呼玉

不掩早辱公愛至深恒竊感知己莫知所以報之迨茲蒞

學公沒已再期而發引之辰予適至雅遂獲與於執绋之
末若有數焉於是少參徐君以黃門蔡君天祐所狀事腐
銘予弗敢承也甲戌予遷閩臬徐君以紀夫人之喪來告
且曰啓擴以俟銘可緩耶義不可復辭乃序而銘之曰

峻極者嵩厥惟土中河流瀟流磅礴萬壑其東
猗睢陽公允茲秀鍾磅礴芥眉八九雲臺
聖典是宗百籍旁通沛哉辭鋒秋湛春融
振武庠雍譽問日鴻頽脫南宮風嘯雲從
給諫惟聰方岳匪躬臺憲滋隆司徒司空
有執有容曰猷曰庸力挽鴻濛潛裨化工

權先構凶 超然赤松 壽考從容 哀榮始終

勒銘幽宮 愧予雕虫

寵 光所蒙 尚式無窮

陝西布政司右布政使孟公墓誌銘

皇上自

典鄭入正大寶刻宿弊薄鴻恩起羣英一新庶理是時曲
阜孟公西野以福建右叅政致政家君奉

詔復陝西右布政使公廩

聖明之復作也疏言二十事曰端聖學曰任輔臣曰勗大
臣曰選諫員曰信詔令曰順時序曰隆儉德曰遵律條曰

省上役日黜會殘曰崇褒賜曰敦師儒曰重撫按曰憲
令白提納微曰飭靖節曰詰兵戎曰久將領曰儲倉廟曰
御客賊明達盡功多見採行衆於是知公之可用者未盡
用而又冀公之復用也未幾公竟以疾終於家嗚呼惜或
公諱麟字瑞魯別號西野姓孟氏其先自揚州徙曲阜婿
於臧氏因姓焉至公第司寇公始復其姓會祖諱彥賣祖
諱貞隱德弗耀考諱紀儒學訓導學者稱樂山先生以公
貴寢贈工部主事貞外郎妣李氏贈安人加宜人後以司
寇考泊祖皆贈通議大夫都察院右副都御史妣泊祖母
楊氏皆贈淑人有姪樂山公得奇夢有金梁玉柱之語彌

月公與司寇公同薦以生公資疑重性開爽早克自樹爲文辭下筆滾滾見者奇之癸卯領鄉薦甲辰登進士第授工部都水司主事監稅餘杭衆稱廉平轉營繕司員外郎又陞郎中督脩益王府第計公費同事者歛手受成歸視司事規畫有方貪商猾匠計無所逞丁內艱服闋改都水司提督南直隸水利奏興水利六事於凡侵河防占官湖者痛懲以法勢家不便陰爲之媒孽改虞衡司在部凡若干年始終一節兩膺

勅命由承德郎晉奉直大夫以資望擢山西右叅政就號効職再擢陝西右布政使以前任勘鹽事左遷浙江按察

副使轉福建右叅政巡撫督逋福晉者爲梗嚚者和之故八
致其事以歸今十年矣公居官清慎委身許國第以方直
忤時未究於用家居孝友耽經史所著述平淡有理趣推
以教人多成就者娶陳氏封安人子男三女二生以景泰
丙子十月十三日卒以嘉靖甲申七月二十三日享年六
十有八將以是年十一月日葬於其原先塋之次司寇公
述事狀俾予爲之銘玉少從闕里諸舅遊則聞公昆弟始
生之祥長從縉紳後及見公昆弟宦業之盛正德己卯迎
駕淮上又見司寇承

康陵顧問首及同產之事及詢公仕之詳蓋公之名著於

天下而聞於

朝廷久矣可謂盛哉故摭事狀次序之係之銘曰

岱宗鄒繹凌重坤
左汶右泗雙流奔

囂昌瑞世生慶門
一苞二榦同厥根

伯公先第揚休芬
司空藩省職孔殷

誰哉尼之道豈屯
明作休復來

湛恩

嘉謨洋洋副所聞
命則已矣心恒存

季公素銘義所敦
幽光千祀貽後昆

資善大夫南京刑部尚書孟公墓誌銘

嘉靖五年三月初四日南京刑部尚書孟公卒于位其僕以聞

朝廷遣官祭葬公卿大夫驚悼嗟咨交致贈奠孤子獻具事狀遣其子紹祖詣予請銘玉素辱公愛兼姻友察宋之契義不容辭公諱鳳字瑞周別號梧岡其先孟氏寓維揚曾祖諱參實始來曲阜附籍臧姓者遂從其姓至公而後改從其宗祖諱貞別號頤全考諱紀別號樂山由舉人任萃亭訓導頤全不仕然能脩善以振其宗樂山雖仕尤能明善以啓其後初以伯子貴樂山贈主事進員外郎妣李氏贈安人進宜人後又以公貴頤全樂山俱贈右副都御

史祖妣楊氏洎李宜人俱贈淑人公之生也與伯兄同旌
宵夢告祥預名之曰金梁玉柱彌月而降凝重開悟識者
竒之伯兄諱麟登甲辰進士累官右布政使公少與兄同
學日授數千言亹亹成誦故學殖益弘淵而不匱爲文辭
簡潔流暢敏而有章弘治己酉發解山東庚戌登進士第
時

朝廷重守令求治於親民壬子選知嵊縣嵊浙東古邑齒
繁而賦殷公養之有素而應之有方不售才以爲功不市
恩以爲德勤農桑興學校使之利安又礪石整堤百八十
丈以障水衝民甚便之於是材譽益彰撫巡交薦天官考

續有公勤敏慎之襄戊午徵拜福建道監察御史丁內艱
辛酉服闋改浙江道嘗督馬政監抽分巡視南城查點下
場馬匹事不憚勞翕然脩舉壬戌巡按宣大時北鄙多警
公肅憲度以振戎備虜聞之不敢侵軼甲子巡按江西值
寧藩潛畜異謀公一處以正折其機牙比及代不能少逞
在道七年疏屢上未嘗示人人問之者曰揚人之過以爲
已名予弗忍也丁卯陞懷慶府知府即其治邑者推廣之
挈綱維布條約倡僚屬以興教化均徭平賦扶善抑奸開
惠通河溉民田二千餘頃暇則進諸生語以爲學讀書作
文之要得人滋多辛未陞山西左叅政懷慶士民懷其德

政爲之立祠巡撫鄧公奏欵留公壬申改河南左叅政督理糧儲屬流寇猖獗提督彭公率官軍追勦引公自輔公雖司犒賞稽餽饑而匡贊寔多冠尋殄滅癸酉督運至京輸納以速而餘羨有歸公私稱便陞河南按察使又即其持憲之素而作新之夙興蒞事務寒暑雨弗休書所行者于壁而日稽銷之吏屬警畏刑獄爲之一清甲戌陞山西右布政使屬天官奏舉方岳以行旌異之典公首與焉尋轉河南左布政使務持大體畧細苛旬宣之政既舉而槩牘出納纖悉必明丙子陞都察院左副都御史丁丑調巡撫順天等府地方公督郡邑嚴察舉飭兵戎罷庸懦畿徼

以寧後以攘敵功屢有錦龍衣寶楮之賜戊寅改提督漕運
公以漕政久弛悉心經營選能以任功剔蠹以祛害運舟
相繼而上國賦以充庚辰兼巡撫鳳陽等府地方庶信素
著禁令益行第以河溢徐邳田廬湮沒

聖駕南巡之後儲峙一空公乃奏免常租裁縮冗費民之
死徙者稍用甦息又建徐節孝陸丞相祠延學者讀書其
中以作人材以厚風化三載考績有貳封推蔭之榮辛巳
陞刑部右侍郎適

今上入承大綱旁求峻望以靖邊郵

命公以本官兼左僉都御史提督宣大三關等處軍務公

恐邊儲馬匹不足以濟具疏陳請

上嘉納之給以內帑公至選將領作士氣明賞罰謹烽堠
虜懼弗復入間一入焉雨雹交作挫衄而去公曰此天威
也有希功者執遊僧乞丐數十人以爲細奸公力辦於

朝竟得全活癸未六載考績進階尋轉左侍郎甲申陞南

京刑部尚書公以留都維舊

聖化維新精白一心以伸邦禁不徇於情不撓於勢始或
議之終乃貼然以服公入官三十七年歷事

三朝清慎勤固無一息之違而忠孝大節尤所致謹少奉
樂山公之訓以克有成仕而有祿相以不及養爲懼入道

時迎李淑人京邸日致其歡疾則憇少親沒則喪祭
禮

孝廟康陵賓天哀毀如考妣然皆出於天性非有強勉處
上敬而不阿處下嚴而不刻子姓姻婚未嘗少假以私而
宗族鄉黨咸有恩意蓋公之學知求於內故於寢門大書
戒慎恐懼四字俾出入觀省則公之脩諸身達於宦業者
槩可知矣生景泰丙子享年七十有一娶張氏訓導張瑄
之女贈淑人繼孔氏闢里學錄孔某之女封淑人男五長
歛聽選生瑤庠生先卒女六孫男六皆幼銘曰

奕奕平昌 始分於魯 鄒國挺生 配於

宣父

洋洋雲仍

散處中土

有來淮揚

爰從厥祖

二靈孕祥

寔承先祐

維司寇公

克邁前武

發解甲科

儒林翹楚

花縣鳴琴

栢臺持斧

曰守曰恭

河汴之游

臬長岳侯

載隆厥所

都憲三遷

以攘以撫

兵利於漕

民安其堵

此侍南書

邦刑是剖

奸宄摧藏

循良林舞

維司寇公

清時碩輔

德以儉成

業由勤補

忠忱孝思

著於章甫

禮節恩施

洽于樽俎

煌煌戒書

常目斯覩

起居行藏

敬茲由戶

維司寇公

君子所怙

胡不百年

一疾而阻

文淵閣

汶泗之交

有原撫

曄勒辭堅珉

流光千古

豐潤伯曹公墓誌銘

嘉靖五年夏四月壬申豐潤伯曹公以疾薨于京師嗣子棟以其祖母之命奉事狀詣予請銘維昔先尚書奉

命遼東總督軍務適先豐潤莊武公爲之總兵近予承乏畱臺兼理江防又適與公同事有世契焉銘奚可辭按狀曹氏世家儀貞元有諱花一者以武畧雄於時生諱勇從高皇帝起兵除暴亂累功陞燕山左衛所千戶生諱勝

從

文皇帝靖內難洎征北虜累功陞本衛指揮僉事生諱義

即莊武公歷都指揮以平蠻寇陞都督僉事鎮守遼東尋
陞左都督掛征虜前將軍印充總兵官曾祖祖泊考俱贈
左都督妣皆夫人在鎮若干年出奇殲虜及出塞斬獲數
多最功封豐潤伯食祿一千三百石賜誥券俾世襲薨贈
豐潤侯謚武莊生諱璘早世追贈豐潤伯生諱振以嫡孫
襲爵嘗宿衛禁中及掌南京前軍都督府事總理操江剔
歷中外懋著忠勤娶顧氏鎮遠侯顧公之女先卒贈伯夫
人側室鄭氏封太夫人寔生公公諱愷字步元別號冰玉
少而岐嶷長而知方貌魁梧識度宏遠

孝廟初襲爵時年甫踰弱冠而能以祖德爲重勵於官箴

居家庭愉愉有常在朝行競競不以爲
冊封檢身束下無少衍忒管神機五軍等營勞勸弗
伍以爾

上聞而嘉之錫衣示寵方是時貂紱中語能忠孝者則必
曰公語剛果有謀者則必曰公譽望益隆羣公交薦庚申
奉

勅鎮守貴州兼提督清平等衛錫蟒衣以壯其行公受命
矢心務圖報稱壬戌苗寇爲孽收斂四出流毒承民公慨
然嘆曰維

上之所以任我下之所以望我者將不在是遂率漢土官

軍奮勇而出申號令設機謀始突新興擒其驍將廢戰艦江摧其巨魁繼而披哈嘛搗箭眉巢穴既傾渠黨黑用剪凡俘獲者四百有餘斬馘者二千九百有餘焚其廬舍二千七百有餘於是妖氛橫清荒服以兵將計功行賞而公以疾引歸

武宗登極憫公舊勞屢有襲衣書籍詩章之錫辛未命公書左軍都督府尋掌府事屢推湖廣甘肅二屯鎮守以忤權宦弗果已復出爲南京中軍都督府僉書衆咸以爲屈勸公引疾以辭公曰公道在人可以寵辱動心乎吾知有活命而已遂解纜南行大夫士愈高其爲人薦剡累上廉

辰奉

利掌南京前軍府事總理操江將士聞之莫不喜以公操
守所素知也屬公有疾弗果視事具疏控辭奉

旨若曰卿歷任年久精力未衰有疾善加調養照督管事
不允所辭公以操江任重不可一日缺人屢疏不已至又
助爲之言乃獲允俞抵家值

今上即位閉門養和藥餌之外惟一奉甘旨爲事且曰使
吾繫身于官何以致吾孝親之忧乎如是者四年竟弗能
起疾革呼嫡子棟指誥券悲泣不勝家人問故惟曰盡忠
報國語不及他逮於屬纊顏色不少變距其生成化己丑

得年五十有八娶鄭氏武安侯鄭公之女封夫人側室張氏子男三長松先任前府右都督次梁習舉子業次棟寔公嫡子女二長適襄城伯長子李全仁次適葉天麟棟等將以是年某月某日奉公歸葬於宛平縣玉河鄉之原上聞輶朝賜祭塋邱典有加究公始終可謂生順而死安生榮而死哀矣銘曰

聖皇開天明良繼作矯矯虎臣世其韜畧千夫萬夫是長是握爰啓伯封有隆動爵濟美維公克承優渥居位靡愆臨戎有恪進匪遑遑退焉奚作出鎮遐荒凜焉銛鏃

既殄凶殘
歛而弗憚
再起江防
咸期勿藥

胡

春 方隆 而年已奔

勒茲幽 永光祠約

伯兄咸叢先生墓誌銘

伯兄咸叢先生諱叢字咸叢古者不謚則以字稱尊之也
維劉氏世家汴京宋季南遷二世祖縣丞府君甘棠勿翦
遂家萬安高祖府君諱昭年值元不仕曾祖府君諱俊英
早世弗祿流光裕後俱贈刑部尚書顯祖府君諱廣衡起
甲第遭際

五朝歷郎署藩臬都臺卒官司寇勳業在國史祖妣康夫

人五受榮封考貢士府君諱賢正學粹德積而弗施妣彭
孺人淑德維配兄少負英敏之資貢士府君課之甚嚴日
就矩矱已而貢士府君捐館舍益自勵於勤日冀遠大方
其爲學也局巨籌燈謝賓客遠人事燕息飲食無往非書
其著之心如契之刻如囊之儲其出之口如決龍門倒三
峽也誦既通益精其義索深研微務得體要如離婁之明
如庖丁之解義既精然後發之文辭引紙占筆娓娓弗休
已復厭其凡近盡焚其稿其文藝森鬱如甲第之崇深綺
繡之麗密是時泰和曾先生石卿善古文辭吉水楊先生
蘊珍深於理學兄皆從遊且出入他經諸史由是所得焉

弘以肆既冠入邑庠與從兄方伯咸卓李解元翹文蕭大
參升榮蕭僉憲必克課試爭先有一蹴千里之勢督學鍾
公黃公俾進廩食蘇公邵公允加器獎而時命弗融屢困
場屋然兄之所以學固不翹此嘗慨然嘆曰古之學者學
爲聖賢聖賢之學學以脩己治人而已於是反之於內而
慎之躬行之間始彭孺人以貢士府君早卒欲兄輟學兄
懇辭曰士而不學何以承先志邪束脩館穀之費胥已焉
措人以爲難婚期既届遭外舅之喪或勸以從俗兄峻辭
服闋而後娶其少而守禮已如此力學之餘分日以理其
家節縮經營訖無廢事貢士府君彭孺人之墓既利既安

而弟妹婚嫁舉無愆期性耿介遇事輒發與人不苟同於利欲介然質其平生蓋無毫絲小人之過晚既齟齬頗放於詩酒每醉輒扼腕浩嘆思起古之豪傑爲伍傲睨斯世殆無一人可其意者然樂於誨人第姪之穎敏者多所訝進比比登舉而凡竟不偶正德丁卯正旦人夢兄盛服擁儀衛乘輿上升俄感疾誦書繹義如時常翼日卒是歲三月初七日也生天順己卯四月初五日得年僅五十娶曾氏有懿行克成內助子男三長中次昇克家又次阜邑庠生勵志顯揚女一適羅魯孫男五人中等既卜吉神潭之原書來索銘嗚呼積善之家必有餘慶天道無親常與善

人若貢士府君若兄懷仁蹈義可不謂善人乎積學勵行
而卒弗試天之與善固如是耶藉曰垂慶則尚書府君而
丁又二世矣或曰不塞不流不止不行積之也久則其發
之也盛天之意庶其在於此歟玉少從兄學有雙璧之稱
兄已矣而玉出繼方伯府君無能顯揚於兄之銘豈勝感
慟姑摭此以徵諸後若夫表章庸俟夫立言君子銘曰五
世維擇百世伊祉鳳誥龍章羲經麟史卓犖令資厥休承
只軫彼晦蒙蹊此砥矢良貴在躬不榮金紫雖壽弗延其
存無止歲歲神潭其水瀰瀰曰公曰卿必復其始

殤文墓銘

殤女素姿劉玉之初生女也甫歲餘秀麗聰慧甚可人意無何疹發不能勝藥之半月餘竟死嗚呼其可哀矣乎況於父母乎又况於累喪之後乎松是歛而葬之墓而銘之若成人然哀之也銘曰

生誰役邪死誰促邪而何速邪其偶然邪其使然邪茫茫者天孰知其然掩之黃泉吊以斯言

朱君墓誌銘

朱君姓也定君名也廷止君字也自西塘徙東門稱桂林者君之世也諱某贈通議大夫右副都御史者高祖也諱與信隱德弗仕者曾祖也諱原飭倜儻而早世者祖也諱

祖貢號東一耿直尚義而以富榮者考也予劉之姑相東
一公阜家而今康強在堂者君之母也自幼岐嶷而英奕
不羣稍長耽文史攻書計日親良師傳而動無過舉者君
之髫年也居東一公側左右無違有所訓誨如奉矩矯東
一公下世劉孺人年漸高先事承順不使少拂其志君之
爲子也事三兄力行恭遜庭無間言而事至輒能以身任
之君之爲弟也性剛介不爲脂韋亦不爲崖岸遇是非迎
刃而解間遇變故則又從容應之氣不少憚君之臨事也
處親戚雅厚賓主必盡歡遇文儒彥士輒握手傾倒交隣
里雖非一姓咸得其和下至臧獲無少躊躇而赴其急難

若拯焚溺君之接人也成化丁亥四月十九日所生也弘治丙辰十月初九日所沒也三十有一君之年也出龍泉雩田彭氏有淑德克持其家者君之配也曰薦早自樹立聘予之次女者君之子也雙秀在閨許嫁予姪璇雩田彭某者君之女也嗚呼予既素愛東一公而又稔交君之仲兄廷章嘗讀書東華見君曙出暝歸步緩安徐而衣履簡朴日以爲常間詢之人蓋督耕也因竊嘆曰君承籍厚矣而能如此世之子弟徒知恣已凌人裘馬馳騁曾不念其父祖創造之難視君何如哉視君何如哉故予於君有感也既而予叨甲第留京師則聞君之訃而君之訃與子弟

咸廷之訃同來爲善而不克壽此予所以哀君也今予來歸則君之子有立而予弟之子亦有立爲善而有後此予之所以爲君慰也黃山之原負父面震君所葬也正德戊辰子月丁酉葬之期也狀其事者誰予弟鄉進士咸表也銘其墓者誰姻家柱下逸史劉玉也銘曰

動而息兮 阳之剛也 靜而復兮 隅之常也
嗟壽年兮 孰天長也 惟弗忝兮 斯所臧也
嘉山辟兮 慎所藏也 後千祀兮 儲厥祥也

正軒彭君墓誌銘

泝遂江而上踰一舍地曰雩田或曰以其地可憇類魯之

舞雩或曰以其地沃而宜稼耕者之所雩故曰雩田鉅姓彭世居之彭之先自唐季來徙畜德彌厚宗姓益藩貲產簪纓之盛甲於鄉邑

國初號仲恭爲項城令治材宦業著聞縉紳項城生北恒雪巖一峯北恒生直夫皆爲時偉人直夫娶項孺人子男四皆爲鄉善士其仲正軒君也予既一峯先生所自出而君之子徵又壻松予其他姻姪葭莩疎於予蹤跡往來於雩溪之上者猶之戶庭其耆宿俊彥猶三叔伯是奉之親也君之卒徵兄弟奉狀事乞銘屬予北上不果今至徵來京求仕館於予屢中前請裁不得辭君諱憲字資治別

號正軒少穎秀長益脩飭貌魁然以頑言鏗然以暢性雖坦夷不爲畛域而臨事果決不爲脂常人以是非質之如鑑別鈇斷或以橫逆加之如松栢之傲霜雪挺然無所屈撓蓋君之爲人庶幾所謂剛者故雖不獲務學以顯於時然施於家者則綽乎有餘裕矣直夫公家故饒君益克拓之田圃之腴不在東阡則在西陌廩藏之積不以秋歛則以冬儲公建春熙堂既美既完君復建居於春熙之左及翔東林別墅於所居之東簷棟蔽虧益宏以壯於是奉二親樂羣從宴賓朋延名師以訓子姓公嘗爲人誣以重罪君亟出詣公府力爲之辨事卒以白其他賦役酬應悉

身任之不遺毫髮以貽親憂其後二親皆年踰八十君承顏色不敢有一日之違會

朝廷舉令典耆年者錫以冠帶栗帛君即贊成之且逮恩榮坊以爲親榮處兄弟怡愉無間言弟思先卒爲之植其孤姪姪又早卒爲之恤其娶婦待鄉鄰和而有禮御僕佃嚴而有恩遇人匱乏恒賑貸之有游枝來寓者病爲之醫死爲之歛其周於人類如此君在成化中以發貲受冠帶之命然人之所以重君者不專在是也娶予邑下驛郭氏有淑行繼其邑南門羅氏子男二長徵克家候王家典膳次即徽邑庠生今任弋陽王府引禮舍人女二長適蘇溪

郭蒙次適子姪劉麒孫男五君生正統壬戌歿正德丙寅享年六十有五墓某鄉某原某向銘曰

五萃之顛 世德可瞻 百福之源 世澤可沿
猗正軒君 寔生世族 匹富是稱 維仁是篤
匪義斯榮 惟善斯福 秋秋後昆 宜其世祿
有歲者阡 卜茲牛眠 我錦用鐫 遷不萬年

熟齋先生文集卷十九

執齋先生文集卷二十

祝祭文

百泉書院告文

沕穆斯道貫乎古今聖賢往矣所存者心百泉之濱有開先覺邵許繼遊姚竇並作探源而上濂洛關閭矧我玄聖萬世作程爰開學宮載嚴像設袞冕在中衣紳就列微哉聖道如天難名所可見者物生時行凡曰升堂猶莫擬議必有事焉博文約禮後是千載以迨羣賢曰承其道曰纂其言不忖狂愚亦私淑艾明德新民與鋤同類爰茲作邑皇命是欽教養弗逮恧焉初心仲春次丁髦士來集豈曰

明禋庶幾承德謹告

衛源祠祭文

一六妙化肇此靈源珠跳百竇金湧重淵蒸而爲雨融而爲川隴畝溉沃餽運資焉神德之懋日有罄名言禮有祈報國典用宣孟夏伊始樽豆有嚴惟神降佑錫我豐年

黑巖山禱雨文

太行衍秀黑巖儲精辭樓下殿以蔭兵城巖崿穹窿石潭幽邃委啓神祠維靈之萃民之報祀厥禮有常神之孚祐其惠可忘迨茲夏春時雨弗降隴畝告枯蒸黎疇望敢因祀禮薦此懇誠令之不職母以病民雷震九霄雲蒸九澤

霖雨豐年維神之德

祭石門山三仙洞康衛侯文

蓋聞人資乎地地顯以神固奇秀之是萃抑精感之相因
維茲石門三仙所宅澤穴淵泓巖樓截峩雲驅雷駕出入
乾坤杳端倪之莫測儼蹤跡之斯存維康衛侯夙慕真道
滅景茲山靈響相照曰雨曰暘曰祈曰禳歲時享祀厥禮
有常崇巖兮巖俎載歌兮屢舞神之祐民兮萬年民之報
神兮千古

黃水口風神祠祭文

天地之氣噫而爲風以動以散是宣化工共城北西黃水

之口土囊翕張厥有靈寶負乾抱巽神位攸宜威靈赫奕
羣心畏思盛夏之初百穀斯播祀禮時脩廟敢或惰牲醴
既成叢核既陳載歌載舞用樂于神習習以風祁祁以雨
民之忻懃式瞻神宇

奉孫處士李共城合祠邵先生行窩告文

祀賢禮也固貴乎其類之同尤貴乎其序之順是窩之所
以顯者以邵先生若孫處士之清節則先生之父之所慕
若李公之精識又先生之學之所由傳也合而祠之以類
則同以序則順仲夏之望神位既成敢以殽醴用信虔告

安樂窩祭文

惟三先生清節妙識達於聖微而蘇門者過化之地也山川如舊典刑斯存敢以醴毅用陳明薦

龍公墓祭文

古之君子所以功顯當時名垂後世者氣也智也量也方秦以虎狼之威睥睨六國而公獨能庭叱之有其氣矣全璧以歸鼓缶而罷有其智矣既而引車避廉以先國事有其量矣嗚呼公亦天下之士而仲連之匹也歟敬謁墓庭高山可仰英魂不昧欷此耿誠

四月禱雨祭文

國以民爲本神以民爲依輝賦重民貧逃亡過半矣茲者

天父弗雨麥且告枯民且缺食將何以出賦稅供粢盛乎
某等德薄才鮮心切焦勞謹卜茲辰用伸祈禱惟神閔念
達之上帝早沛甘澤以活斯民其或令民有過而天譴之
神宜爲之湔釋俾得改過無爲國憂以作神羞謹告

衛源禱雨文

神之流澤著于天下

朝廷之尊崇吏民之欽仰亦云至矣茲者天父弗雨夏麥
告枯民之皇皇如墮焦火惟神發源斯邑能憇然無情乎
謹率吏民用伸祈禱伏丐沛汪洋之餘潤蘇憔悴之羣枯
大濟斯民用章神化謹告

三仙潭禱雨文

竊聞山川之氣升而爲雲降而爲雨以茲山之磽磽崖
之幽深仙靈之所依蛟龍之所憩其感而遂通以澤天下
宜無難者輝縣困於賦歛今又迫於旱乾麥苟無成民將
安仰恭率士民祠於潭下惟神憫念賜之甘霖下以遂斯
民之生上以供

國家之賦則非惟令有無窮之感而神亦有無窮之休謹

告

禱雨祝文

茲者亢陽爲雲雨澤愆期穀穗萎黃豆苗不長是皆當職

官吏人等舉措失宜刑罰過當以致天譴然人治於明神
繞於幽幽明之間亦當均任其責謹卜茲辰潔誠用禱惟
神達之上帝早賜甘霖使

國賦有供民生有賴則當職過湔而神之責亦塞矣謹

告

又禱雨祝文

蓋聞神依於民民資於食春耕秋穫儲必足於九年秋報
春祈禮斯通於八蜡向者亢陽爲霆雨澤愆期薦禱於神
旋致昭格幸茲穀方吐實豆亦抽榮倘一質之覆廟於爲
山則九仞之深同乎廢井是用丹忱一罄玄造重籲苟吏

治之弗脩尚期於改或民生之有謹宜憫其怠列缺起潛龍沛八荒之霖雨飛廉驅旱魃登九有之豐年庶國有無疆之休而神亦有無疆之譽謹告

謝雨告文

旱焉而禱雨焉斯沛今之罪以渝民之生以遂神之靈神之惠也報禮非豐期於有歲

十賢堂告文

道之在人初無今古卓哉群賢寔承鄒魯曾無極者理至要者心茫茫墜緒舜哲堯欽世儒荒唐出口入耳敬義撻撻知行荆杞不有正學孰牖其愚天德王道一貫無餘亦維

宋都文啓中夏濂溪二程邵張司馬克續其緒晦菴南軒
伯恭平仲異派同源其等未跡後塵欣企前烈敬消次丁
薄陳芳列惟學有教惟教有師相我成德以裨明時

祭家宰許公文

嗚呼上天之於豪傑夫豈偶然而生盖將使之珪璋乎治
化潤澤乎生民此其進止存亡實關氣數夫豈區區小智
所能窺測而經營公起邑庠而承家學遂登甲第而達雲
程內甚持憲外臬司刑激揚追蹤平攬轡乎反比迹乎棠
陰已而屢遷都憲受寄邊庭北虜警折衝而効順西蕃忻
奏凱而輸誠中更回翔克安義命俄膺太拜益懋勳名長

司馬則邦政爲之振肅晉家宰則銓度以之公平方是時
權姦弄政事變糾紛公處之如砥柱中流屹然獨立黃河
洩湧勢必使之東傾萬方仰其倚庇百辟藉以持循然日
能明於晝而不能明於夜春維利於德而不利於刑始也
孔子之於中山翼其可化終焉臧倉之於孟子卒尼其行
公於是掛冠朝署稅駕山林鳳高翔而麟高逝夫何怪乎
舞狐兔而語鼯鼈宜乎公厭斯世而遐升乎宜漠然吾猶
見其英傑之氣峙山嶽而流風霆也嗚呼天報疎而弗爽
公論久而益明箕裘之業既承芳於累世鍾岱之績殆必
垂光耀於千齡玉緑先契知愛夙承桃李參苓徒興懷於

往迹矣鷄黍酒嗟莫罄於微塵跽陳辭而一真寫哀憤於

幽明嗚呼尚享

祭巡撫孫公文

嗚呼公以精敏之才剛大之氣陞總憲之階而膺疆維之
寄方逆藩之創謀尤正人之是忌嫌烈焰於層霄張狂瀾
於平地公於是誠亦危矣然順逆之間綱常所繫身必死
而後節可全身苟生則名必替孟子云二者不可得兼舍
生取義公於是亦既安矣夫何庸於私計然君子之所以
嗟咨涕洟而不能已者蓋傷夫哲人之永遊千里緘辭慮
茲清齊嗚呼尚享

祭羅栗齋先生文

羅著西岡厥新維舊是生哲人如瓊在玖德稟純精學殖
兼懋炳焉弸虎豈曰文繡藝苑揚芬儒科擢秀爰歷外庠
以升內胄搃管摛辭如夙攸構執經悟疑如鍾斯叩化雨
涵濡桂庭滋茂三鳳翩翩雲程並邁嘗望宗偕名家孰若
榮封屢加祿養逾厚優游林泉樂茲耆壽天胡難謀修爾
齒邁邱典渙頒增隆山阜榮斯哀斯光前裕後其等契重
江鄉愧靡官守遡風陳哀薦茲清酌尚享

祭陽明王公祭文

嗚呼公之才拔乎其萃嗚呼公之學出乎其類嗚呼公之

功疇克似之嗚呼公之壽竟止於斯嗚呼尚享

祭陳克謹先生文

東林躋森菱湖瑩潔匪富則稱是鍾人傑金精玉粹藝苑
馳聲鵬搏鯤運甲第蜚英筮仕宿松牧茲百里賦足政平
吏畏民喜內革斯陟憲度脩明遐荒嶽從近甸風清績最
優遷臬司之副江嶺奧區鑄茲戎賦權布竊柄正論日搖
浮雲牧徒林壑逍遙更化賜環程蕃再蒞政譽沛蒸薦剡
騰沸爰長其屬用集厥功文深革面投刃來向藩轄三遷
旬月未匝述職推賢恩禮降洽寔臨江右嘉政用宣再清
嶺服都憲之權入正棘卿明刑輔治維允維明遑恤勞勸

日焉同事宵昧弗晨胡哉一堅爲此不仁忠盡之心清白之操事定蓋棺青史有耀懷我實好惻然盡傷輶駕莫挽薦此清觴嗚呼尚享

祭馬拙菴錦衣文

於維尊靈清時之傑冒次恢弘才猷卓越世德克承武階是疎錦服金符黃屏丹闕在公惟寅臨政則哲迢遞星輶東吳西粵人將索瘢公獨窓雪衆方貪饕公獨冰蘿眷用之來如井之渫譽羣之歸如山之巒比予邁屯遠逮繩繼舟楫風濤輪蹄奔蹶予命斯安公顏匪悅却金之仁士類胥慄予蒙渥恩再登朝列傾蓋豈新斷金彌切公有賢配

壺相維協桂庭春敷蘭閨秋潔內外往來情誼傾竭殆同
友昆靡間時月丁亥予歸携酒來別拭淚殷勤寧知永訣
嗚呼公之致福康寧耄耋公之垂慶不冠奕葉公復冥憾
顧予寡德懷報徒深微言遽絕沒不憑棺墓不臨穴計者
後時愚衷已觖緬縷緘辭薄陳芳烈比望長號心摧氣咽
嗚呼哀哉尚享

祀名宦祠告文

祀典之陰風化攸係卓哉諸公宦輒來繼或敷於政以阜
民生或輔以教或顯於名高山匪頽景行伊永建祠文靈
公論維允忝塵後躅欣企前脩爰陳敷奠式藉芳猷謹告

祭賴州王二守死事

嗚呼生也者人之所惜孰知義爲之質死也者人之所惡孰知義爲之度人孰不生巾幘浮沉人孰不死枕席呻吟卓哉王侯決於死生奮馬革之壯志留虎頭之芳聲人或以爲舍生之易予獨以爲得爲國爲民之經風獵獵兮江之潯搖搖者丹兮揚揚者旌慨英雄兮莫起嗟歎忍兮何心念交情捨曩昔兮愁抑鬱兮難任酌潢汗以三奠歸乎來兮海宇宜冥尚享

祭死難者文

忠義之在天下與元氣而流行國統藉之以正人紀賴之

而明比者盜攘猝起南北縱橫荼君臣之大義瀆宇宙之常經公等或司民社或寄戎兵或分官守或被榮名雖崇卑之有間俱名義之匪輕當賊鋒之犯順遂慷慨以捐生張睢陽之將校顏平原之友比身雖亡而莫贖氣猶凜而長存某躬行天討殘賊是膺鼓風雷之正氣滌原野之餘腥茲者全師入汴奏凱朝京念諸公之遇難尚忠憤之難平潔樽罍以陳奠酒刻素以據情壯山河而騎箕尾永不昧於明靈尚享

尚書府君壽寧祠堂祭告文

昔在乙亥閏歲繹騷揭竿以逞據山爲巢時繼府君寔承

皇命總憲督師歐壤弗靖既除大憝遂撫遺黎祥刑宥罪
不侈鯨鯢爰開壽寧奠厥井邑迨茲周星千戈用戢士仰
其德民懷其功尸祝俎豆祀典攸崇先君繼武副臬于閩
肆予小子亦玷後塵謹遣儒官芳馨是薦汎掃祠庭尚期
躬踐謹告

祭東一公文

惟靈秉心易直處性高明早孤而能立既壯而能成信孚
於鄉邑惠洽於孤茕然皆出於稟賦之美非有藉於學力
之勤胡不廊廟以公以卿然稍出其餘緒而已沾乎簪綬
之榮謂宜壽考以閱隆平胡一疾之弗瘳遂返旆於玄城

是宜英傑之氣鬱而爲雨雪散而爲風霆呼叱八極以泄
其不平之鳴而粹然之質炳然之靈又當沉爲珠玉升爲
日星齊久於山岳同運於化鈞衍無窮之令緒垂不朽之
芳聲是蓋旦暮常理庶所謂生順而死寧而予所以感悼
悲傷長涕泣而不已者蓋外以爲善人之惜而內以盡親
舊之情嗚呼尚享

祭慎軒兄文

嗚呼伐木之風久矣其亡彎弓下石交道愈荒惟慎軒公
玉質金相寔承詩禮不侈倉箱始予髫齡契合負方眷遊
接軫夜雨連床予方志學公則于臣早用或窘公則于襄

進滋用喜退亦是臧乘山麗澤益篤弗忘戊辰之歲
講張予達

詔獄公允撝惶揮金致贈束楚羸糧賜環重晤迎嘆欲狂
琴書詩酒日焉徜徉迨予起撥別音琅琅豈不懷只邈哉
參商少微忽殞電石流光歲心鉢耳計來盡傷顧瞻顏色
落月屋梁牛眠何許芳草萋涼嗟我幼姪辱婿公郎公孫
雖幼抑既昂藏姻緣義浚澤與仁滂勒銘金石庶克用章
雲山黓黓雲水洋洋緘辭寓奠語短情長嗚呼尚享

祭表兄李喬望文

嗚呼余之祖姑君之祖妣雖殊枝柯實同根柢維君善世

如鳳之毛肯堂之志克家之勞視余周親罔間昆弟意君
百年篤祐不替云胡不漱奄忽沉渝氣矣二子寥哉二親
丹旐飄揚素燈明滅號君不來有聲嗚咽崇此一豆奠此
一觴千古之別千古之傷尚享

祭孚兄辭

惟靈簪纓之彥詩禮之英魁梧秀傑端厚淳明外恭松長
內叶松親既和於友抑禮於賓鋒銳吐劍笑語飛音名雖
高於月旦志不墜於雲程何天不憇何善無親年甫半松
下壽慶已委於後人嗚呼哀哉情孰親於兄弟變孰大於
死生矧德化之不奕抑報施之未平嗚呼哀哉玉隕兮珠

沉木壞兮梁傾桂折兮荆悴鴈斷兮鴻驚嗚呼哀哉愁結
兮難任氣憐兮難伸寒雲黯兮宵暗苦雨滴兮秋聲列
岳兮爲豆酌江海兮爲樽跪陳辭兮訣別渺何許兮孤墳
嗚呼哀哉尚享

祭坦夫兄文

嗟嗟吾兄竟止斯耶哲人之逝世道之衰惟兄賦性中坦
外夷不驕於勢抑惠抑慈方予之幼驥伏鸞羈惟兄知我
迅奮是期既登仕版中更除蠶兄尤恤我曾不吝貲荐寵
冠簪咫尺憂疑俄然起廢南北睽離謂兄遐壽景福攸宜
胡哉二堅構此凶危嗟予義薄含歎弗知訃音千里目斷

神馳幸兄有子克荷克持振揚遺德庶兄在茲有聲哽咽
有淚漣漙莫陳觴豆薦此緘辭尚享

祭亡妻文

嗚呼哀哉我與汝爲夫婦十年于今汝既識予之性予亦
諳汝之心汝少失父中又睽離既長歸我事復紛擾予性
踈簡汝亦靜專唯諾之外匪笑匪言久乃克合如水之凝
我歌爾笑我呻爾吟琴瑟之好百年是期孰爲生死孰爲
別離湖湘之行滻貫追我謂父弗寧爾居其可曾謂我行
而子凶禍嗟乎嗟乎我之薄情一至此耶汝病不聞汝死
不見奔走來歸汝櫟已殮嗟乎嗟乎我將誰歸咎耶謂爲

君子赤子何知謂爲蒼天蒼天無私其無乃我生之不減
其無乃爾善之弗積抑豈脩短之有常雖造化不能以損
益也嗟乎嗟乎我年二十有九學業未就弟妹子女十人
在幼親老予憮汝復不壽誰與我而扶携誰與我而營構
即我心之不堪知汝懷之未釋死生有常汝勿憂惕晝則
依我之几筵夜則歸我之枕席育我子女撫我家室嗟乎
嗟乎死者無知寧復知此徒令生者抱恨無已百年攸悠
一瞬息爾同穴之言相期於死洋洋者觴酌我淚涕峩峩
者肴切我肝肺長天可傾白日可翳汝曾不知我心不替
嗚呼哀哉尚享

祭外姑文

貞閨之秀懿閨之萃三從有耀四德靡瑕於儉菴公克相
於始於南坡君克成其子祀隆祖禰慶衍孫曾木冠詩禮
奕葉相承踰耄怡怡貽榮甘旨書曰康哉詩云樂只慚非
玉潤寔荷水清既妻以女復蔭其甥泰岱滄溟崇深何極
欲罄纖埃豈容涓滴胡云一疾竟阻百年萱帷堂肯發墮
中天揮淚長號輶車斯祖薄奠陳辭哀告終古

祭十妹文

惟靈挺乎閨秀光乎閨儀世德所萃母教是裨克敬克順
克孝克慈中外少長靡不曰宜宜福之厚宜壽之眉胡然

一疾竟莫能支夫喪其偶子失其依家庭悼泣里閈嗟客
矧予同氣孔懷之私妹生雖晚父愛鍾之速今酷沒尤母
之悲痛莫能挽目斷魂離薄陳斯奠奠謹我辭九原茫茫
知邪不知

祭東門女文

汝生之初予之所痛汝長而淑予之所憐既歸得所予之
所慰善而不壽胡然者天乎老已矣諸幼欷然臨棺一奠
哀莫容言

執齋先生文集卷二十